

L'uolp ed il tgiet

da La Fontaine

Inagada seseva in tgiet sin ina seiv annunziond il di cun siu cant. Cheu ei in'uolp seschluitada neutier ed ha laghegiu cun desideri sil tgiet grass.

„Bien dil!“, ha l'uolp salidau curteseivlamein. „Tgei bellezza di ch'igl ei oz!“ Il tgiet ha pigliu la dètga tema, cura ch'el ha viu tgi che ha salidau el aschi honzeliamein. Plein anguoscha eis el setenius vid la seiv ed ha strusch ughegiu da trer flad.

„Miu car frar, daco pomai eis ti vilaus sin mei? Lein buca finalmein far pasch e emblidar nossa carplina?“ Il tgiet steva aunc adina sco enguttaus silla seiv e scheva nuot. „Sas ti aunc buca ch'il retg dils animals ha proclamau la pasch?“, ha l'uolp cuntinuu cun vusch migeivla e carmalonta. „El ha tarmess mei sco curriera per la tiara entuorn. Neu giu per che nus sappien sereconciliar. Fai denton vinavon, jeu stoi aunc purtar quella novitad a biars auters.“

Dalla tema ha il tgiet laguttii duas gadas tut da schetg ed ha lu detg siper sesez: „Quella coga damognel jeu mo cun ses agens rampins.“ Senza schar sentir enzatgei da sia tema ha el clamau giu dalla seiv: „Mia cara amitga, ei legra mei zun fetg ch'era ti proclomas la pasch. Gie, lein far pasch. Igl ei bien che ti eis cheu, pertgei jeu vesel gest dus auters curriers che vegnan neutier. Lein spitgar sin els e festivar ensemen quella legreivla nova. Jeu crei che ti enconuschies ualti bein els, igl ei ils dus tgauns da guardia dil patrun.“

L'uolp ha strusch udiu quei, ch'ella seglia si e cuora naven aschi spert sco mo pusseivel. „He, spetga tonaton!“, ha il tgiet clamau suenter ad ella. „Jeu hai aunc bia da far“, ha l'uolp tahegiu. „Jeu festiveschel lu in auter di cun tei, da gliez sas ti sefidar.“ Il tgiet denton ei selegraus che siu rampin fuva gartegiaus.

L'uolp che haveva fatg tut aschi ponderau e malizius ei gest quei mument vegnida disturbada da ses pli gronds inimitgs. Quei ha vilentau pulitamein l'uolp.
Mo nua eran ils tgauns?

L'uolp ei stada eri ed ha mirau anavos. Negin persecitava ella ed ins udeva era buca giappem da tgauns. Era ei forsa ual reussiu a quei tgiet vegl e tup da cuglienar ella?